

Headline	2014 Tarif elektrik naik		
MediaTitle	Utusan Malaysia		
Date	28 Nov 2013	Language	Malay
Circulation	173,387	Readership	699,000
Section	Dlm Negeri	Page No	15
ArticleSize	247 cm ²	Journalist	N/A
PR Value	RM 14,645		



Kenaikan 20 peratus melibatkan antara 6 hingga 7 sen/kWj

2014: Tarif elektrik naik

KUALA LUMPUR 27 Nov. - Kerajaan dijangka mengumumkan kenaikan tarif elektrik awal tahun hadapan sebagai sebahagian daripada program merasionalisasikan subsidi.

Menteri Tenaga, Teknologi Hijau dan Air, Datuk Seri Dr. Maximus Johnity Ongkili (**gambar**) berkata, kerajaan membelanjakan sebanyak RM12 bilion setiap tahun untuk subsidi sektor tenaga.

Katanya, pengumuman mengenai kenaikan tarif akan dilakukan selepas Mesyuarat Kabinet, namun beliau memberi jaminan masyarakat berpendapatan rendah akan tetap mendapat pembelaan.

"Mengenai kadar kenaikan tarif, pihak syarikat utiliti meminta kenaikan antara 10 hingga 20 peratus namun kerajaan akan menentukan kadar yang berpatutan dan pada masa yang sama, syarikat utiliti mendapat pulangan modal yang sewajarnya," katanya kepada pemberita di Parlimen hari ini.

Kali terakhir tarif elektrik negara dinaikkan ialah Jun 2011 dengan kenaikan sebanyak 7.12 peratus iaitu kepada 33.54 sen/kWj.

Menurut Maximus, kenaikan sebanyak 20 peratus tarif elektrik nanti akan melibatkan antara 6 hingga 7 sen/kWj.

Jelas beliau, kenaikan harga minyak serta gas asli dunia sentiasa berterusan dan mempengaruhi kemampuan kerajaan untuk menyalurkan subsidi dalam sektor tenaga.

"Penstrukturan semula tarif elektrik dapat mencerminkan kos yang ditanggung syarikat utiliti dan seterusnya menyalurkan subsidi kepada kumpulan yang memerlukan secara lebih fokus," katanya.

Jelas Maximus, usaha merasionalisasikan subsidi itu juga selari

dengan program transformasi industri tenaga elektrik negara bagi meningkatkan lagi daya saing sektor tenaga negara terutamanya di rantau ASEAN.

Katanya, transformasi yang dilakukan juga mencerminkan ketelusan dengan syarikat-syarikat pengeluaran tenaga bebas (IPP) dan menuntut tahap kecekapan Tenaga Nasional Berhad (TNB) ditingkatkan.

"Kerajaan juga memberi penekanan terhadap masalah pembaziran tenaga elektrik, memang perkara ini membabitkan teknologi dan kos tetapi perkara utama adalah sikap.

"Kajian Agensi Tenaga Antarabangsa untuk rantau ASEAN mendapati 30 peratus tenaga elektrik mengalami pembaziran kerana penggunaan tidak efisien," katanya.

Dalam pada itu, Maximus berkata, daripada lima syarikat IPP generasi pertama, hanya dua diperbaharui kontraknya iaitu Genting Sanyen Power dan Segari Energy Ventures setelah mengambil kira faktor tahap efisien dan harga.

Katanya, kontrak untuk IPP generasi kedua akan bermula 2016 dan 2017.

